

Kumpendeza Mungu



SABATO MCHANA

Somo la Juma Hili: *Lk. 15:11–32, Zef. 3:17, Efe. 5:25–28, Isa. 43:4, Rum. 8:1, Rum. 5:8, Mk. 9:17–29.*

Fungu la Kukariri: “Bwana, Mungu wako, yu katikati yako shujaa awezaye kuokoa; Atakushangilia kwa furaha kuu, Atakutuliza katika upendo wake, Atakufurahia kwa kuimba” (Sefania 3:17).

Hebu fikiria juu ya tukio lifuatalo: mtoto wa miaka mitano anakuja kwa baba yake na zawadi iliyofungwa vibaya katika Sikukuu ya Akina Baba duniani. Kwa furaha anakabidhi zawadi kwa baba yake.

Hebu fikiria kwamba baba anasema, “Mwanangu, sijali kuhusu zawadi yako. Hata hivyo, hakuna kitu ambacho utanipa kinachoweza kunifurahisha. Chochote unachoweza kunipa, ninaweza kujipatia mwenyewe, na kitu chochote utakachonipa kilinunuliwa kwa fedha zangu au kilitengenezwa kwa vitu nilivyonunua. Kwa hivyo, baki na zawadi yako. Sihitaji wala siitaki. Lakini nakupenda, hata hivyo.”

Lo!

Una maoni gani kuhusu mwitikio wa baba huyu? Maneno kama ya “asiye na huruma,” “mwenye dharau,” na “mwenye moyo mgumu” huja akilini. Je, hivi ndivyo Mungu anavyoonesha mwitikio kwetu? Je, kweli tunaweza kumpendeza Mungu? Ingawa ni vigumu kulielewa hilo, hasa kwetu sisi kama viumbe walioanguka, waliopotoshwa na dhambi, na wenye mwelekeo wa kutenda maovu—ndiyo, tunaweza kumpendeza Mungu! Kwa maneno mengine, Mungu hatutazami, au zawadi tunazomletea, kwa mtazamo wa baba huyo. Kinyume chake, tunaweza kumpendeza Mungu, lakini kupitia Kristo pekee.

Yenye Thamani Zaidi Kuliko Uwezavyo Kufikiri

Kama tulivyoona katika somo lililotangulia, hakuna mtu —hata mwenye dhambi mbaya kabisa au mwovu kuliko wote—ambaye Mungu hampendi. Na kwa sababu Mungu anawathamini watu zaidi ya vile tunavyoweza kufikiria, anachukizwa na dhambi kwa sababu anatupenda na anajua dhambi inachotufanyia, pia.

Soma Luka 15:11–32. Mfano wa mwana mpotevu unafunua nini kuhusu huruma na upendo wa Mungu? Unatoa onyo gani kwa wale ambao, kama yule mwana mwingine, walibaki nyumbani?

Katika kisa hiki anachosimulia Yesu, mwana wa mtu huyo aliomba urithi wake mapema, akimkataa baba yake na nyumba ya baba yake kabisa. Kisha mwana mpotevu anakwenda na kutapanya urithi wake na anafikia hali ya umaskini na njaa, akitamani chakula wanachokula nguruwe katika kihori. Akitambua kwamba watumishi katika nyumba ya baba yake wana chakula cha kutosha, anaamua kurudi nyumbani kwa matumaini ya kuwa mtumishi.

Kinachofuata kina nguvu. Akina baba wengine wangemfukuza mtoto kama huyo anaporudi. “Ulichukua urithi wako na kujiondoa nyumbani kwangu. Huna nyumba tena hapa.” Huo ungekuwa mtazamo wenye mantiki, na wenye maana kabisa, sivyo? Machoni pa baadhi ya wazazi wa kibinadamu, mwana huyo alikuwa ameenda mbali sana kiasi cha kutowezekana kurejeshwa nyumbani tena, hasa kama mwana.

Lakini, katika mfano huo, baba (anayemwakilisha Mungu Mwenyewe) haitikii kwa njia mojawapo ya hizi. Badala yake, “[mwana mpotevu] alipokuwa angali mbali, baba yake alimwona, akamwonea huruma, akaenda mbio akamwangukia shingoni, akambusu sana” (Lk. 15:20). Ijapokuwa nyakati kama hizo ilionekana kuwa jambo lisilo la heshima kwa bwana mwenye nyumba kukimbia kwenda kumlaki mtu fulani, baba huyo kwa huruma yake kubwa alikwenda mbio kumlaki mwanawe na, cha kushangaza zaidi, akamrudisha nyumbani mwake, hata kumfanyia sherehe, ikionesha huruma kubwa ya Mungu kwa kila mtu mpotovu na furaha Anayokuwa nayo hata mtu mmoja kurudi nyumbani. Ni taswira ya Mungu ya kuvutia kiasi gani!

Kinachouvutia ni mwitikio wa mwana mwingine. Kwa nini mwitikio huu ulikuwa mwitikio wa kibinadamu, ulioegemezwwa angalau kwa sehemu juu ya haki, na unaoeleweka sana, vilevile? Hata hivyo, sehemu yake ya kisa inatufundisha nini kuhusu jinsi dhana za kibinadamu za haki hazifikii kina cha injili au upendo wa Mungu kwetu?

Kushangilia kwa Furaha Kuu

Ingawa ni vigumu kwetu kuelewa, Mungu anamwona kila mtu kuwa wa thamani isiyopimika, ndiyo maana anafurahia wokovu wa hata roho moja.

Soma Sefania 3:17. Aya hii inafafanua je mfano wa mwana mpotevu?

Sefania 3:17 inaonesha kwa mkazo furaha ya Mungu juu ya watu Wake waliokombolewa. Karibia kila neno linalomaanisha furaha na shangwe katika lugha ya Kiebrania limetumiwa katika aya hii moja, likielezea furaha ya Mungu juu ya watu Wake waliokombolewa. Ni kana kwamba hakuna istilahi moja kwa yenyewe inayotosha kuelezea ukubwa wa furaha ya Mungu katika siku hiyo.

Ona, pia, Mungu alipo kulingana na aya hii—"katikati" ya watu Wake. Upatanisho unaotokana na uhusiano wa upendo huambatana na kuwepo kwa haraka kwa Mungu. Kama vile baba—anapomwona mwanawe kwa mbali, anakuja mbio—hapa Mungu yu katikati ya watu Wake.

Katika Isaya 62:4, taswira kama hiyo inaelezewa kwa mfano wa ndoa. Kwa mujibu wa Isaya 62:4, watu wa Mungu 'wataitwa Hefsiba,' linalomaanisha "Ninamfurahia," na nchi itaitwa "Beula," inayomaanisha "kuolewa." Kwa nini? Kwa sababu, aya hii inasema, "BWANA anakufurahia, na nchi yako itaolewa." Kilele cha furaha ya Mungu kinawekwa akiba kwa ajili ya siku ya urejeshaji, atakapowapokea watu Wake na kutufurahia, kama vile baba alivyomfurahia mwana wake mpotevu.

Soma Waefeso 5:25–28. Hili linasema nini kuhusu aina ya upendo ambao tunaitwa pia kuuonesha?

Aya hii inawasihi waume kuwapenda wake zao "kama Kristo naye alivyolipenda kanisa na kujitoa kwa ajili yake," na kuwapenda wake zao "kama miili yao wenyewe" (Efe. 5:25, 28). Aya hizi hazikazii tu aina ya upendo usio na ubinafsi na wa kujitoa kafara mume anaopaswa kuwa nao kwa mke wake bali pia zinaonesha kwamba Kristo Mwenyewe anawapenda watu Wake (kanisa) kama sehemu Yake Mwenyewe.

Kumpendeza Mungu?

Inawezekanaje kwamba Mungu wa ulimwengu wote apendzwe na wanadamu tu, matone ya muda mfupi ya sehemu hai za seli katika sayari moja ndogo katikati ya kile ambacho huenda ni ulimwengu usio na ukomo? Inawezekanaje kwamba wanadamu wanakuwa wa maana/ sana kwa Mungu, aliye na uweza wote na asiyehitaji chochote? Maswali haya yanaweza kuchanganuliwa katika vipengele viwili. Kwanza, Mungu Mwenyewe anawezaje kufurahishwa? Pili, wanadamu wanawezaje kumfurahisha, hasa kutokana na hali yetu ya dhambi? Kipengele cha kwanza cha maswali haya ni mada ya leo na kipengele cha pili ni mada ya kesho.

Soma Isaya 43:4; Zaburi 149:4; na Mithali 15:8, 9. Hutuambia nini kuhusu Mungu kupendzwa na watu Wake?

Kama tulivyoona kwa sehemu ya jana, Mungu anaweza kupendzwa na wanadamu kwa sababu Mungu anawapenda watu kwa namna ya kuzingatia masilahi yao ya juu kabisa, kama ambavyo mtu yeyote anayewapenda na kuwajali wengine.

Kinyume chake, Mungu huchukizwa na watu Wake wanapofanya maovu. Kwa kweli, Mithali 15:8, 9 inafundisha kwamba, ingawa “sadaka” na “njia” ya waovu ni “chukizo kwa BWANA,” “maombi ya mwenye haki ni furaha yake” na “Yeye humpenda [mtu] afuataye haki.” Siyo tu kwamba aya hii inaonesha kwamba Mungu anachukizwa na uovu, lakini huonesha kwamba anafurahia wema. Pia inaweka furaha na upendo wa Mungu katika uhusiano wa moja kwa moja wa kila kimoja kwa chenzake, kuonesha uhusiano wa kina kati ya upendo wa Mungu na furaha Yake, unaoonekana katika Maandiko yote Kulingana na Zaburi 146:8, “BWANA huwapenda wenye haki.” 2 Wakorintho 9:7 inaongeza, “Mungu humpenda yeye atoaye kwa moyo wa ukunjufu.” Angalia, kwanza, kile ambacho aya hizi hazisemi. Haziasemi kwamba Mungu anawapenda waadilifu tu au kwamba Mungu anampenda tu atoaye kwa moyo mkunjufu. Mungu anampenda kila mtu. Hata hivyo, ili maandiko haya yawasilishe jambo, ni lazima yamaanishe kwamba Mungu anampenda “mwenye haki” na “atoaye kwa moyo wa ukunjufu” katika maana fulani ya pekee. Kile tulichoona katika Mithali 15:8, 9 kinatoa dokezo: Mungu anawapenda hawa na wengine katika maana ya kupendzwa nao.

Fikiria jinsi mbingu na dunia zinavyofungamana kwa ukaribu kiasi kwamba Mungu, Mwumbaji wa ulimwengu wote, anaweza kujihusisha kwa ukaribu sana, hata kihisia, nasi. Wazo hili la kushangaza linapaswa kukupa tumaini gani, hasa ikiwa unapitia wakati wa dhiki?

Mawe Yaliyo Hai

Ni kwa namna gani sisi, kama viumbe walioanguka, wenye dhambi, tunaweza kumpendeza Mungu Mtakatifu?

Soma Warumi 8:1 na Warumi 5:8. Aya hizi zinatufundisha nini kuhusu nafasi/hadhi yetu mbele za Mungu?

Mungu huwapa watu neema kabla ya mwigitio wowote wa mwanadamu. Kabla ya chochote tunachosema au kutenda, Mungu hutujia na kutupa fursa ya kukubali au kukataa upendo Wake. Kama Warumi 5:8 inavyosema, “Bali Mungu aonyesha pendo lake yeye mwenyewe kwetu sisi, kwa kuwa Kristo alikufa kwa ajili yetu, tulipokuwa tungali wenye dhambi,” (linganisha na Yer. 31:3). Na tunaweza kupatanishwa na Mungu na hata kumpendeza machoni Pake, kwa imani kupitia kazi ya Mkombozi wetu.

Soma 1 Petro 2:4–6 na ulinganishe na Waebrania 11:6. Hili linatuambia nini kuhusu jinsi tunavyoweza kumpendeza Mungu?

Bila Mungu kuingilia kati, watu walioanguka hawawezi kuleta chochote cha thamani kwa Mungu. Lakini Mungu, kwa neema na rehema Zake, amefanya njia, kupitia kazi ya Kristo. Hasa, “kwa njia ya Yesu Kristo” tunaweza “kutoa dhabihu za roho zinazokubaliwa na Mungu” (1 Pet. 2:5). Ingawa “pasipo imani haiwezekani kumpendeza” (Ebr. 11:6), kwa kazi ya upatanishi ya Kristo, Mungu “atawafanya kuwa wakamilifu” waaminio “katika kila tendo jema mpate kuyafanya mapenzi yake, naye akifanya ndani yetu lipendezalo mbele zake, kwa Yesu Kristo, utukufu una yeye milele na milele. Amina” (Ebr. 13:21). Wale wanaomwitikia Mungu kwa imani wanahesabiwa kuwa wenye haki mbele zake kwa njia ya upatanisho wa Kristo, ambaye haki Yake pekee ndiyo inayokubalika. Na wale wanaoitikia mwanzo wa upendo wa Mungu wanahesabiwa kuwa wanastahili kwa njia ya upatanisho wa Kristo (Lk. 20:35), Naye huwabadilisha wafanane Naye (1 Kor. 15:51–57, 1 Yoh. 3:2). Kazi ya Mungu ya ukombozi si kwa ajili yetu tu, bali ndani yetu, pia.

Kwa nini wazo la Kristo kuwa mpatanishi wako mbinguni linatia moyo sana?

Lengo Linalostahili

Chini ya mwamvuli wa rehema na upatanisho wa Mungu, Mungu hufurahia hata mwikio mdogo chanya kwa upendo Wake. Kwa njia ya Yule ambaye pekee anastahili upendo na Yeye Mwenyewe ni mwenye haki kabisa, kila mmoja wetu anaweza kuhesabiwa haki na kuhesabiwa miongoni mwa wapendwao na Mungu ambao wataishi Naye katika upendo mkamilifu milele. Hili ndilo tumaini kuu la ukombozi, linalohusisha kazi ya Kristo kwa ajili yetu mbinguni.

Lakini, unaweza kujiuliza, hili linaweza kunijumuisha hata mimi? Je, ikiwa mimi sifai? Je, ikiwa ninaogopa kwamba imani yangu ni haba?

Soma Marko 9:17–29. Je, Mungu anamjibu mtu huyo katika kisa hiki? Imani kiasi gani inatosha?

Wanafunzi hawakuweza kutoa pepo; matumaini yote yalionekana kupotea. Lakini Yesu akaja na kumwambia baba yake, “‘Ukiweza, yote yanawezekana kwake aminiye’” (Mk. 9:23). Na huyo baba akajibu kwa machozi, “‘Naamini; nisaidie kutokuamini kwangu!’” (Mk. 9:24).

Ona, Yesu hakumwambia mtu huyo, “Nirudie utakapokuwa na imani zaidi.” Badala yake kilio chake, “‘Nisaidie kutokuamini kwangu,’” kilitosha.

Pasipo imani haiwezekani kumpendeza Mungu (Ebr. 11:6), lakini Yesu anakubali hata imani ndogo kabisa na, kwa imani (kwa njia ya upatanisho wa Kristo), tunaweza kumpendeza. Kwa njia ya imani na kwa sababu ya kazi ya Kristo kwa niaba yetu, tunaweza kuitikia kwa njia zinazompendeza Mungu, sawa na jinsi baba wa kibinadamu anavyofurahi mtoto anapomletea zawadi isiyo na thamani.

Hivyo, tunapaswa kufuata ushauri wa Paulo wa kufanya liwe lengo letu “kumpendeza” Mungu (2 Kor. 5:9, 10, linganisha na Kol. 1:10, 1 The. 4:1, Ebr. 11:5). Na tunapaswa kumwomba Mungu abadilishe maslahi yetu ili kujumuisha masilahi bora kabisa ya wale tunaowapenda, na kupanua upendo wetu ili uwafikie wengine. “Mpendane ninyi kwa ninyi; kwa heshima mkiwatanguliza wenzenu; kwa bidii, si walegevu; mkiwa na juhudi katika roho zenu; mkimtumikia Bwana; kwa tumaini, mkifurahi; katika dhiki, mkisubiri; katika kusali, mkidumu; kwa mahitaji ya watakatifu, mkifuata ukarimu” (Rum. 12:10–13).

Ikiwa Mungu anatukubali kwa njia ya Kristo, tunapaswa kuwakubali wengine zaidi kiasi gani? Amri ya kumpenda jirani yako kama nafsi yako (Law. 19:18, Mt. 22:39) na kanuni ya msingi ya kuwatendea watu jinsi unavyotaka utendewe vinafafanua je wazo hili?

Jifunze Zaidi: Soma Ellen G. White, “‘Msifadhaike Mioyoni Mweni,’” uk. 275-295 katika *Tumaini la Vizazi Vyote*, Sehemu ya Pili.

“Bwana husikitika watu Wake wanapojitazama kama wenye thamani ya chini. Anataka uzao Wake mteule kujithamini kulingana na thamani aliyowawekea. Mungu aliwataka, la siyo asingemtuma Mwana Wake katika utume aghali wa kuwakomboa. Ana namna ya kuwatumia, na anafurahishwa wanapoomba mambo makubwa kabisa Kwake ili kulitukuza jina Lake. Wanaweza kutumaini kuona mambo makubwa ikiwa watakuwa na imani katika ahadi Zake.

“Lakini kuomba katika jina la Kristo kuna maana sana. Kuna maana kwamba tunapaswa kuikubali tabia Yake, kudhihirisha roho Yake na kutenda kazi Zake. Ahadi ya Mwokozi ilitolewa kwa sharti. “Mkinipenda,” Anasema, ‘Mtazishika amri zangu.’ Huokoa watu, siyo katika dhambi bali kutoka dhambini; na wale wanaompenda wataonesha upendo wao kwa utii.

“Utiifu wote wa kweli hutoka moyoni. Kwa Kristo ilikuwa ni kazi ya moyoni. Kama tukikubali, atategemeza fikira na makusudio yetu, ataunganisha hivyo mioyo yetu na nia zetu pamoja na mapenzi Yake, kiasi kwamba tunapomtii tutakuwa tunatekeleza matakwa ya mioyo yetu. Nia, iliyosafishwa na kutakaswa itapata furaha kuu katika kuifanya huduma Yake. Tunapomfahamu Mungu kama ilivyo fadhila kwetu kumfahamu, maisha yetu yatakuwa maisha ya utii wa daima. Kwa njia ya kuipenda tabia ya Kristo, tutazichukia dhambi.”—Ellen G. White, *Tumaini la Vizazi Vyote*, Sehemu ya Pili, uk. 280.

Maswali ya Kujadili:

① Inaweza kumaanisha nini “kupokea bila ubinafsi”? Unafikiri uhusiano wa kutoa na kupokea utakuwaje mbinguni na katika nchi mpya?

② Wakitoka sehemu ya mbali ya ulimwengu—huenda mbali zaidi kuliko darubini ya anga ya James Webb inapoweza kufikia—wajumbe wa kimbungu walimrejelea nabii Danieli kuwa chamudot, “mpendwa, mwenye kutamanika, mwenye thamani.” Na walifanya hivyo mara tatu. Katika Danieli 9:23, Gabrieli anasema ki chamudot attah, “maana wewe unapendwa sana.” Katika Danieli 10:11, kiumbe wa mbinguni (labda Gabrieli tena) anamwita ish chamudot, “mtu upendwaye sana,” msemu unaorudiwa kwa Danieli baadaye (Dan. 10:19). Fikiria juu ya kile unachosema kuhusu Mungu na jinsi alivyo karibu nasi. Unaweza kupata tumaini gani kutokana na ukweli huu wa ajabu?

③ Mifano ya mashujaa wa imani iliyojadiliwa katika Waebrania 11 inahusiana vipi na maudhui ya somo la juma hili? Hasa, mifano hiyo inafunua nini kuhusu jinsi mtu anavyoweza ‘kumpendeza Mungu’ kwa imani? Ni nini unaweza kujifunza na kutumia katika maisha yako ya kila siku kutokana na mifano kama hiyo ya imani na uaminifu?